

Qallunaat oqaasiinut taarsiullugit Tuluit oqaasiisa pingaarnertit aappaattut Nunatsinni meeqqat atuarfianni atuartitsissutigineqartalernissaat pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Vivian Motzfeldt, Siumut)

Akissuteqaat

(Ilinniaritaaneremut, Kultureqarneremut, Ilisimatusarneremut Ilageeqarnermullu Naalakkersuisunut Ilaasortaq)

Ilisimaneqartutut ukioq kingulleq upernaakkut meeqqat atuarfiat sukumiisumik nalilersorneqarpoq upernaq maanna Ilinniarfissuarmi ilinniaritissunngorniartarnermik nalilersuinermik malitseqartinneqartumik. Nalilersuinerit marluusut nalorninaatsumik takutippaat meeqqat atuarfiat inuiaqatigiit piunasaqaataannik ilimagisaannillu piviusunngortitsissappat suli pitsanngortitassarpasuaqartoq. Naalakkersuisut taamaammat isumaqarput meeqqat atuarfiat ilinniaritaanerup iluani iliuseqarfissatta suli pingaarnersarisariaqaraat, taamaammat pingaarnertigut ilinniakkanut meeqqat atuarfiata kingorna ingerlaqqiffiusunut tamanut tunngaviliisuususaq. Taamaattumik tamanit pingaartinneqartariaqarpoq inuusuttut meeqqat atuarfiat naammassigaangamikku - inuusuttut ilinniarfiini aallartinnissamut piginnaasat pisariiallit tamaasa pigiliutereersimasassagaat.

Naalakkersuisut tunngaviusumik isumagaat inuiaqatigiittut nunarsuarmioqataasutut ineriartornikkut nunarput inissisimalluarnerussasoq innuttaasut ilinniarsimassusaat qaffassarsinnaagutsigu minnerunngitsumillu atuartut oqaatsitigut piginnaasat qaffassarnerisigut meeqqat atuarfianni nunarsuarmioqatigiit oqaasiannik salliutitsinikkut oqaatsit atuartitsissutaasut aapperneqarneratigut.

Naalakkersuisut taamaammat Inatsisartut 2017-imi ukiakkut ataatsimiinnissaannut meeqqat atuarfiata inatsisissaannut allannguutissatut siunnersuummik saqqummiussissallutik pilersaaruteqalereerput. Siunnersuutissaq ilaatigut ilaqassaaq meeqqat atuarfianni tuluit oqaasii allamiut oqaasiisut august 2018-imiit siullinngortinneqassasut danskillu oqaasii allamiut oqaasiisa aappaattut inissinneqassasut.

Ilisimassavarpullu tuluit oqaasiisa meeqqat atuarfianni allamiut oqaasiisut siullinngortinneri atuarfeqarfitsinnut allannguutinik annertuunik malitseqartariaqassasoq soorlu aamma taamatut ikaarsaariarnermi atuartut arlallit danskit oqaasiinik ilitsoqqussaralugu 1. klassimiilli atuartinneqarnissamut pisariaqartitsilissasut. Siusinnerusukku misilittakkat takutittareerpaat tuluit oqaasiinik atuartitsinermik pingaartitsinerulerneq siuartitsinerlu immiini atuartunut tuluttut oqallorinnerulersitsinanilu angusarissaarnerulersitsissanngitsoq. Ilinniaritissunik allamiut oqaasiinik pitsaasumik atuartitsinissamut piginnaasalinnik amigaateqareerpugut. Tamanna ilaatigut ilinniaritissunngorniartarnerup nalilersorneqarnerani takuneqarsinnaavoq tassanimi tuluit oqaasiini angusat appasissorujussuusut ilinniaritullu ikkittuinnaat atuartitsissut linjefagitut toqqartaraat inerniliunneqarpoq. Oqaatsit inissisimanerinek allannguneq taamatut ittoq taamaattumik ilinniaritissunik piginnaanngorsaaqqiinernik annertuunik piunasaqaateqassaaq, ilutigitillugulu atuartitsinermi atortussanut nutaanut

anigaasaliisoqartariaqassalluni atuartitseriaatsinillu nutaanik - ilaatigut IT-mik, qarasaasiatigut atuartitsinermik alimasissumillu atuartitsinernik pitsaanerusumik atuiffiusunik malitseqartinneqartariaqassalluni. Oqaatsit ulluinnarni atorneqaraangamik ilikkalertorneqarsinnaanerupput; ilinniarneq taanna aaqqissuussaangitsoq nunatsinni ullutsinni periarfissaarpiangilaq atuartut minnerunngitsumillu ilinniartitsisut akornanni tuluit oqaasiinik ulluinnarni attaveqatigiinnermut annertunerusumik atuisoqanngimmat.

Naalackersuisut ilaatigut tamanna peqcutigalugu ataatsimiititaliamik immikkut ilisimasalinnik inuttalikkamik pilersitsiniarput – kommunit atuarfiillu peqatigalugit meeqqat atuarfianni allamiut oqaasiinik atuartitsinerup, oqaatsinik isiginnittaatsip kiisalu ilikkariartortarnermut isiginnittaatsip qanoq ineriartortinneqarnissaannut tigussaasunik innersuussusiortussanik.

Soorlu ilaatigut ilinniartitaanermut pilersaarummi takuneqarsinnaasoq Naalackersuisut meeqqat atuarfiannik iluarsaaqqinneq nukittorsarniarpaat, Ilinniartitaanermut Aqutsisoqarfik - ilinniartitaanermut pilersaarummi suliniutissanik kivitseqataasussatut piviusunngortitseqataasussatullu pilersinneratigut – taassumalu suliaasaanut ilaassapput allamiut oqaasiinik atuartitsinermi salliutitsinissamik pilersaarutit piviusunngortinneqarnisaat. Naalackersuisut siunnersuuteqartoq oqallisissiamik saqqummiussineranut qutsavigaat qilanaaralugulu tusassallugu Inatsisartut tuluit oqaasiisa meeqqat atuarfianni allamiut oqaasiisut siullinngortinnissaanut apeqcut qanoq isumaqarfigineraat.

Oqallilluarisi.